



Publicaziuns dalla vischnaunca, jamna 22

Lubientscha da baghegiar

L'istanza da baghegiar ha concediu suandonta lubientscha da baghegiar:

Nr. 2011-1034

Pius e Jordana Lozza-Desax, Via dils Larischs 6, 7180 Disentis/Mustér; tschentar ina casetta nova da curtin, parcella 1012, Via dils Larischs 6, 7180 Disentis/Mustér.

Quella lubientscha sa vegnir contestada enteifer 30 dis dapi la publicaziun el Fegl official dalla Surselva tier la Dertgira administrativa dil cantun Grischun.

Disentis/Mustér, ils 30-5-2011
Uffeci da baghegiar Disentis/Mustér

Annunzias da baghegiar

All'istanza da baghegiar ei sin fundament digl art. 64, alinea 2 dalla lescha da baghegiar e digl art. 40 dall'ordinaziun davart la planisaziun dil territori dil cantun Grischun OPT vegniu annunziau suandonts projects:

Nr. 2011-2061

Corina ed Ursin Defuns, Via dils Larischs 12, 7180 Disentis/Mustér; furar per pompa da calira, parcella 936, Via dils Larischs 12, 7180 Disentis/Mustér.

Nr. 2011-2062

Simon Camartin, Via Chischliun 14, 7180 Disentis/Mustér; tschentar sin tetg-casa dus collecturs da sulegl, parcella 995, Via Chischliun 14, 7180 Disentis/Mustér.

Nr. 2011-2063

Alfons Berther, Via Foppas 14, 7186 Segnas; remplazzament dallas finiastras dalla casa sin parcella 131, Via Foppas 14, 7186 Segnas.

Encunter quellas decisiuns san ins protestar a scret enteifer 20 dis dapi la publicaziun alla suprapostonza communal.

Disentis/Mustér, ils 30-5-2011
Uffeci da baghegiar Disentis/Mustér

Invit ad ina sera d'informaziun

Dapi entgin temps ei la planisaziun locala cun la nova lescha da baghegiar en vigur. Plinavon ha il Cussegl grond mess avon in onn en vigur la nova lescha d'energia cun novas prescripziuns en connex cun spargnar energia e l'applicaziun d'energias regenerablas.

Per saver informar sur da quellas novas prescripziuns envidein nus ils planisaders e sorprendiders da nossa vischnaunca ad in'orientaziun. Ei fagess plascher sche Vus savesses esser presents alla sera d'informaziun che ha liug

mesjamna, ils 15 da zercladur 2011 alla 20.00
en halla Cons a Mustér.

Denter auter vegn il cusseglader da baghegiar, Christian Wagner ad informar davart la cussegliaziun da baghegiar ed igl intent da quella.

Suprapostonza communal Disentis/Mustér



Purschida gratuita

La vischnaunca da Mustér porscha a ses habitonts la pussevkladad da visitar gratuitamein la Casa da traffic a Lucerna, www.verkehrshaus.ch. Al spurtegl dall'administraziun communal sa per mintga di digl onn vegnir retratg 5 entradas gratuitas. En quella purschida ei cunteniu:

- entrada gratuita ella Casa da traffic a Lucerna cun museum, planetarium, museum da Hans Erni
- teater da film IMAX per in prezi special (frs. 4.– reduzziun)
- 10% rabat sin artechels ella stizun dil museum

Co fuss ei da far inagada in'excursiun a Lucerna, forsa gest cun nezegiar la carta dil di per viagià cun quasi tut ils mieds da traffic publics en Svizra? Dapli informaziuns retscheveis Vus tier l'administraziun communal Mustér (tel. 081 920 36 36 ni e-mail: admin@disentis.ch).

Nus giavischein ina nunemblideivla aventura el museum il pli frequentau en Svizra.

Suprastonza communal

Vischinadi Segnas

Invit alla radunonza extraordinaria

Dumengia, ils 5 da zercladur 2011 allas 20.15 en casa da scola, Segnas.

Tractandas:

1. Beinvegni
2. Elecziun d'in dumbravuschs
3. Prelecziun ed approvaziun dil protocol
4. Orientaziun president
5. Status novs; presentaziun ed approvaziun
6. Recepir il vischinadi Momp. Tujetsch; discussiun e votaziun
7. Deliberaziun da damondas e propostas
8. Varia

Cordialmein envida la suprastonza dil vischinadi Segnas

Vischinadi Funs/Clavaniev

Invit alla radunonza extraordinaria

**Venderdis, ils 10 da zercladur 2011
allas 20.15 el hotel Sax.**

Tractandas:

1. Beinvegni
2. Elecziun d'in dumbravusch
3. Prelecziun ed approvaziun dil protocol
4. Orientaziun presidenta
5. Eventuala fusiun
6. Presentaziun dils statuts novs ed approvaziun
7. Varia

*Cordialmein envida
La suprastonza*



Clom d'urgenza 118

Preziadas vischinas, preziai vischins

Onn per onn dat ei cass en nies cantun nua ch'ils pumpiers vegnan clamai memia tard sil plaz da seracass. Savens emprovan habitontas e habitonts da cuntonscher pumpiers ch'els enconuschan via telefon privat. Il temps che va aschia a piarder ha ils davos dus onns caschunau la veta a duas persunas el Grischun! Plinavon daventan ils donns cun mintga minuta spiarsa pli gronds. Perquei s'adressein nus a Vus cun ina ferventa supplica: clamei ils pumpiers mo sur il clom d'urgenza 118. Era sche Vus veis mo in pign problem sa il polizist che pren encunter Vies telefon reagir aschia che mo ina pintga gruppa d'agid ni singulas persunas vegnan clamadas.

Ulteriuras informaziuns era davart la prevenziun anfleis Vus sin nossa pagina
www.pumpiers-sursassiala.ch.

Engraziel per Vies sustegn!

Vos pumpiers Sursassiala

Cuorsa dil Rein Impediments sin differentas vias

Preziadas vischinas, preziai vischins

Dumengia, ils 5 da zercladur 2011 ha liug la 4. Cuorsa dil Rein. L'occurrenza sespleiga denter las 11.00 e las 14.30. Durent quei temps eis ei da quintar cun impediments entras curridras e curriders sin suandontas vias dallas vischnaucas da Mustér e Tujetsch:

Via Acletta–Via Luzzas–Via Sut Baselgia, Via Glaretsch–Vitg da Segnas, Via Tguinter, Via Bugnei, Via Niriël, Via Surrein/Cavorgia, Via Cavorgia-sut, Via Valzeinza, Via Raviul–Via Salez e Via Buretsch, Via Cuoz, senda Cavorgia–Mumpé Medel, Via Mumpé Medel–senda Cufllons/S. Gada, Via S. Catrina–Funs-dado–Via da Paders, Via Claustra, Via Sursilvana denter Mobilias Fry e Via Disla, Via Disla, Via Brulf, Via Cavardiras, senda Brulf–Fontanivas, senda Fontanivas–Cufllons.

Bien engraziament per Vossa capientscha e Vies sustegn! Ulteriuras informaziuns ed annunzias sut:
www.cuorsadilrein.ch

*Cordials salids igl ok
La cuorsa dil Rein.*

Uniun fallun e cascharia Disla/Mustér Di svizzer dils mulins

Sonda, ils 4 da zercladur 2011 dallas 10.00–19.00

- Il fallun vegn mess en funcziun
- Prender investa dil mulin vegl, stiva da filar, dalla cascharia sco era dalla resgia
- Ustria sil plaz

Ha enzatgi utensils vegls che vegnevan duvrai en connex cun luvrar si glin ni en cascharia?
Tel. 081 947 48 78.

*Bien engraziament e sin seveser
La suprastonza*



Lavar ora la baselgia

Gievgia, ils 9 da zercladur lavein nus ora la baselgia. Nus essan fetg engrazieivlas a mintgina che pren la peda da vegnir e segidar cun nus. Era umens ein cordialmein beinvegni. Nus entschavin allas 8.00. Ils zenns tuccan.

Prendei cun Vus: lumpa, barschun e sadiala.

En cass da mortori vegn il datum refiers sin ils 16 da zercladur.

*Grond engraziament per Vies agid
La suprastonza*

Preavis: Lotto a Mustér

**Sonda, ils 19 da november 2011
allas 20.00 el center da sport e cultura.**

Nus supplichein autras uniuns da risguardar quei datum.

*Cordialmein envida
Uniun Indoor-Festival*

Exercezi regional dallas uniuns samaritanas Tujetsch, Medel e Mustér a Medel

Gliendisdis, ils 6 da zercladur 2011

L'Uniun samaritana Mustér serimna allas 19.00 avon halla Cons.

Equipament: resti cauld, buns calzers e cazzola da maun.

Igl exercezi ha liug da tutt'aura.

*Sperond a stedia participaziun salida cordialmein
la presidenta*

Uniun da catschadurs Péz Alpetta Salvament d'anseuls cavriel

Preziai purs

Ussa ei il temps che las cauras cavriel fan ansiel. Stedi setegnan ellas si cun lur anseuls en praus che vegnan segai. Aschia vegnan mintga onn anseuls per la veta entras maschinas da segar. Cun pign engaschi san ins evitar quei. Purs che fan fein en loghens nua che cavreuls setegnan si, ein supplicai da s'annunziar tier nus in di avon che segar. Aschia savein montar mintgamai ina bandiera el prau pertuccont. Entras il disturbi da quellas prendan las cauras ils anseuls ord il prighel.

Annunzias saveis far tier il cau da tgira sut la numera 078 817 72 30.

Bien engraziament per Vossa collaboraziun

*Uniun da catschadurs Péz Alpetta:
Il cau da tgira*



Uniun da dunnas Mustér
Mummas cun affons pigns Mustér

Suentermiezdi a Fontanivas

En cumpignia lein passentar in suentermiezdi a Fontanivas. Ei vegn barsau servalas e zambergiau ina sorpresa. Tut las mummas cun lur affons ein cordialmein envidadas.

Cu: mesjamna, ils 15 da zercladur 2011
Rimnada: sper la piazza da termagliar a Fontanivas
Temps: 14.00

Voss'annunzia pren Susanne Strupler, 081 936 43 14, bugen encunter entochen ils 13 da zercladur 2011.

Sin Vossa participaziun selegran
Mummas cun affons pigns Mustér

Inauguraziun

Dumengia, ils 5 da zercladur 2011 allas 12.00 ha liug a Mumpé Medel l'inauguraziun dil baghetg niev dall'uniun da scursalar e spassegiar Mumpé Medel. Pusseivladad da gentar per in e scadin.

Nus selegrein sin Vossa viseta.
Uniun da scursalar e spassegiar Mumpé Medel

Beach-Sport Plaun Petschen, Cumpadials

Mira sut Sumvitg.

Ludoteca Mustér

Liug/Ort: Halla Cons, tel. 076 494 39 92
e-mail: ludoteca@disentis.ch

Uras d'avertura / Öffnungszeiten:
Gliendisdis/Montag: 18.30–20.00
Gievgia/Donnerstag: 16.00–17.30
Venderdis/Freitag: 18.30–20.00

13. radunonza generala dall'uniun Ludoteca Mustér

**Mesjamna, ils 15 da zercladur 2011
allas 20.15 el local dalla ludoteca.**

Tractandas:

- Beinvegni
- 1. Elecziun d'ina dumbravuschs
- 2. Protocol dalla 12. radunonza generala dils 5-2-2010
- 3. Rapport dalla presidenta
- 4. a) Rapport dalla cassiera
- b) Rapport dallas revisuras



5. Elecziuns:
 - a) actuara
 - b) cassiera
 - c) revisuras
6. Program da lavur
7. Varia
 - a) Undraziuns

Tuttas famiglias e persunas che possedan in abbonament dalla Ludoteca Mustér ein automaticamein era commembers dall'uniun ed entras quei envidai alla radunonza generala. Ei vegn tarmess negins invits.

In cordial beinvegni.

La suprastonza dalla Ludoteca Mustér

Biblioteca populara Mustér

Liug: Casa da scola, tel. 081 947 52 90, biblioteca@disentis.ch

Sut www.disentis.ch ni www.bibliotecas-surselva.ch anfleis Vus nies entir catalog bibliotecar. Per e-mail saveis Vus reservar ina ni pliras medias ed enteifer 5 dis retrer ad emprést ellas en biblioteca populara.

La biblioteca ei aviarta:

<i>Gliendisdis</i>	<i>18.30–20.00</i>
<i>Mardis</i>	<i>13.30–15.00</i>
<i>Gievgia</i>	<i>16.00–17.30</i>
<i>Venderdis</i>	<i>18.30–20.00</i>

Nies motto: Leger . . . tedlar . . . mirar . . . !

Nus selegrein da mintga viseta.

Biblioteca populara Mustér

Biblioteca populara Mustér

Praulas e historias cun Mats, la miur

Eis ti denter 2 e 6 onns? Has ti gust da vegnir cun tia mumma ni cun in'otra persuna d' accumpignament en biblioteca e tedlar praulas ni historias? Mats, la miur e nus dalla biblioteca raquitein a ti ina praula ord in cudisch da nossa valischa da surprasas e quei mintga gada il **second venderdis dil meins dallas 14.30 entochen ca. allas 15.30.**

Nus selegrein zun fetg sin tei ...

Tgisà, forsa anflein nus mintgatun aunc enzatgei auter che mo cudischs en nossa valischa da surprasas!

Cun ils pli cars salids e sin seveser tochen gleiti

Mats, la miur ed il team dalla biblioteca populara Mustér